



12

Niining Leksyona Matun-an Mo Kini

Gidihogan si Jesus Didto Sa Betania

Ang Panagsabot Batok kang Lazaro

Ang Madaugong Pagsulod ngadto sa Jerusalem

Ang mga Gresyanhon Nangita Kang Jesus

Nagsulti si Jesus mahitungod sa Iyang
Kamatayon

Ang pagka-dili matinoohon sa mga Judio

Ang Pulong ni Jesus mao ang Magahukom

GIDIHOGAN SI JESUS DIDTO SA BETANIA (Basaha ang Juan 12:1-8)

Didto sa Betania gidalitan si Jesus ug pagkaon. Gibuboan ni Maria ang Iyang mga tiil ug mahalon nga pahumot, aron pagpakita sa iyang gugma alang Kaniya. Niining higayona si Judas nagpakita nga siya dili matuod nga tinun-an ni Jesus. Tungod kay miingon man siya nga mas maayo unta kon gibaligya ang maong pahumot aron makakwarta ug matipigan alang sa mga tinun-an. Miingon siya nga ang kwarta magamit aron pagpakaon sa mga kabus, apan ang kamatuoran niini mao nga siya usa ka kawatan ug buot niyang tipigan ang kwarta sa iyang kaugalingon.

Buhata Kini

1. Unsay nahitabo diha sa ilang pagpangaon?
 - . . . a) Gikawat ni Judas ang kwarta gikan sa sudlanan nga alang sa tanang tinun-an.
 - . . . b) Gibuboan ni Maria ang mga tiil ni Jesus sa pahumot ug si Judas miingon maayo pag gibaligya kini.
 - . . . c) Nagpaila si Judas nga dili matuod nga tinun-an tungod kay wala siya motambong sa maong panihapon.

ANG PANAGSABOT BATOK KANG LAZARO

(Basaha ang Juan 12:9-11)

Daghan ang mga tawo nga nakigkita kang Lazaro sa ilang pagkadungog nga kini nabanhaw gikan sa mga patay. Tungod niining maong hitabo, daghan ang mga katawhan nga mitoo kang Jesus.

Si Satanas, ang yawa, kaaway sa Dios ug Siya nagadasig sa mga katawhan sa pagpakig-away batok sa Dios. Iyang gidasig ang mga pangulo sa relihiyon sa pag-alsa batok kang Jesus. Buot nilang patyon si Lazaro tungod kay siya man maoy buhing kamatuoran nga si Jesus mao gayud ang pagkabanhaw ug ang kinabuhi. Mitoo ang mga katawhan kang Jesus tungod sa Iyang pagpamatuod. Si Satanas sa gihapon karon buot mopatay niadtong mga tawo nga nagasulti mahitungod sa gahum ni Jesus.

Buhata Kini

2. Ngano nga ang mga pangulo sa relihiyon naghunahuna man sa pagpatay kang Lazaro.
 - . . . a) Tungod kay daghan ang mitoo kang Jesus pinaagi sa pagpamatuod ni Lazaro.
 - . . . b) Tungod kay nagpuyo man si Lazaro sa Betania.
 - . . . c) Tungod kay si Lazaro misupak sa balaod.

ANG MADAUGONG PAGSULOD NGADTO SA JERUSALEM

(Basaha ang Juan 12:12-19)

Usa kadto ka panahon sa pasko sa mga Judio, usa ka tinuig nga pagsaulog aron paghinumdom kon giunsa sa Dios sa pagluwas ang mga katawhan gikan sa pagkaulipon ug sa kamatayon. Daghang mga tawo ang miadto sa Jerusalem niining panahona, ingon nga mao kini ang dapit nga gitudlo sa Dios alang kanila.

Miadto si Jesus sa Jerusalem aron pagsaulog sa Pasko sa mga Judio. Ang mga katawhan miwarawara sa mga lukay Kaniya sa iyang pagsulod sa lungsod nga nagsakay sa nating asno. Ilang gibuhat kini ingon nga pagpasidungog kang Jesus nga ilang Mesias ug Hari sa Isarel. Tapus niini sa dihang gidakop si Jesus. Ang mga kaaway ni Jesus nagpangil nga Siya naghimo sa iyang kaugalingon nga hari.

Karon, gikinahanglan magatan-aw kita kang Jesus ingon nga atong hari. Dili sa kalibutan o politikanhong paagi kon dili hari sa atong kinabuhi. Ang usa ka hari nagadumala sa usa ka gingharian. Ug si Jesus kinahanglan nga maoy magdumala sa atong mga kinabuhi. Busa magatinguha kita sa pagbuhat sa buot Niyang ipabuhat. Usa ka butang nga nagadala ug kaulaw sa simbahan karon mao nga daghan sa mga Cris-



tohanon mibati nga igo na nga mosimba sila. Ug sa gawas sa simbahan wala sila magkinabuhi sa gitudlo ni Jesus. Kinahanglan nga mahimong hari si Jesus sa atong mga kinabuhi bisan asa kita, sa eskwelahan, sa merkado, sa trabahoan o bisan diing dapit.

Buhata Kini

3. Para sa unsa man ang Pasko sa mga Judio?
 - . . . a) Usa ka pagsaulog sa mga katawhan sa pagluwas sa Dios kanila gikan sa pagkaulipon.
 - . . . b) Usa ka panahon diin ang usa ka tawo nga nagpuyo sa layong dapit moadto sa Jerusalem aron pagbisita sa ilang mga higala.
 - . . . c) Usa ka panahon diin ang mga katawhan mobalhin ug usa ka relihiyon ngadto sa laing relihiyon.
4. Unsa may nahitabo sa pag-adto ni Jesus sa Jerusalem?
 - . . . a) Gitudloan Niya ang mga katawhan sa kahulogan sa pasko.
 - . . . b) Misakay siya sa nating asno aron pagbisita sa Iyang mga higala.
 - . . . c) Giabi-abi Siya sa mga tawo ug gitawag ug Hari sa Israel.
5. Unsaon man ni Jesus pagkahari karong panahona?
 - . . . a) Siya mahimong hari sa nasud nga atong gipuy-an.
 - . . . b) Siya mahimong hari sa atong kinabuhi ug magadumala niini.
 - . . . c) Siya mahimong hari sa simbahan apan walay labot sa gawas.

MGA GRESYANHON NANGITA KANG JESUS

(Basaha ang Juan 12:20-26)

Ang ubang mga Greshanyon miadto sa Jerusalem aron pagpakigkita kang Jesus. Nasayud si Jesus nga umalabot na ang adlaw nga ilansang Siya sa krus, sama sa usa ka kriminal. Apan tungod sa Iyang kamatayon, dili lamang ang Gresyanhon ang maluwas kondili ang tanang tawo sa matag nasud. Mabatonan nila Siya nga ilang Hari hangtud sa kahangturan. Bililhon kini nga angay pakamatyan. Si Jesus daw' sama sa usa ka trigo nga kinahanglan ilubong sa yuta aron magapamunga pa ug daghang mga trigo.

Juan 12:24-25. Ang usa ka lugas trigo kinahanglan mahulog sa yuta ug mamatay kay kondili man, nan, magapabilin kini nga maginusara.

Miingon si Jesus nga kinahanglan nga magsunod kita Kaniya. Kinahanglan magmasinugtanon kita sa paghalad sa atong kinabuhi alang sa kawsa aron makadawat ang uban Kaniya ug mamaluwas;

Buhata Kini .

6. Sag-uloha ang Juan 12:24, 25.
7. Pag-ampo nga magamatinumanon ka sa imong pagsunod kang Jesus bisan pa kon kamatayon ang bugti alang niini.

NAGSULTI SI JESUS MAHITUNGOD SA IYANG KAMATAYON

(Basaha ang Juan 12:27-36)

Unsaon nimo pag-ampo? Mao kini ang kasi-natian ni Jesus. Buot Siyang moampo ngadto sa Dios nga luwason Siya gikan sa maong kasaki-tan, apan nasayran Niya nga mianhi Siya sa kalibutan gikan sa langit ug nagpakatawo alang sa maong katuyoan, Siya mamatay alang sa kasal-anan sa tibook kalibutan, alang sa imo ug akong mga kasal-anan. Busa miampo Siya nga, “Amahan pasidunggi ang imong kaugali-ngong ngalan!”

Daku kaayo ang kalig-on nga nadawat ni Jesus sa Iyang pagkabati sa tubag sa Dios gikan sa langit nga mabati-an sa tanan. Ang Dios uban Kaniya. Magatabang ang Dios Kaniya sa pag-labang sa umalabot nga pag-antus sa krus. Ug pinaagi sa Iyang kamatayon ang ngalan sa Dios mahimaya ug mapasidunggan.



Diha sa kamatayon ni Jesus nahukman ang sala. Nahukman usab si Satanas. Ug nahukman usab ang imong mga sala. Giangkong ug nahinukman si Jesus tungod sa atong mga sala. Apan ang kamatuoran magpabilin nga kon dili nimo dawaton si Jesus ingon nga imong manluluwas moatubang ka sa Dios sa umalabot aron pagdawat sa silot sa imong mga sala.

Panaglitan nakautang ka ug daku ngadto sa imong higala. Apan adunay laing mobayad alang sa imong nautang. Buang-buang ka kon maningkamot ka pa aron mabayran pag-usab ang imong nautang! Si Jesus nagbayad na sa imong dakung utang pinaagi sa Iyang pagpakamatay alang sa imong mga sala. Apan aron maimo ang mga kaayohan; sa Iyang gibayad gikinahanglan nga dawaton mo Siya ingon nga Manluluwas ug Agalon.

Buhata Kini

8. Unsa may gibuhad ni Jesus mahitungod sa sala sa Iyang pagkamatay?
- . . . a) Iyang giangkong ang tanang sala sa mga katawhan aron makabaton sila ug kagawasan gikan sa sala.
 - . . . b) Iyang giangkong ang sala sa mga katawhan apan silotan lang gihapon sila sa ilang sala.
 - . . . c) Iyang giangkong ang sala sa mga katawhan apan kadto lamang mga magatoo Kaniya mao ang makabaton ug kagawasan sa silot sa sala.

ANG PAGKA-DILI MATINOOHON SA MGA JUDIO

(Basaha ang Juan 12:37-43)

Daghan sa mga katawhan wala managpanoo nga si Jesus mao ang Mesias tungod kay wala man Siya mahaum sa mga hunahuna sa mga katawhan mahitungod sa Mesias. Apan bisan pa ang ilang pagkadili matinoohon mihaum sa gisulti ni propeta Isaias mahitungod sa Mesias.



Daghan ang mga kadagkuan nakasabut nga si Jesus mao ang Mesias apan nangahadlok sa pagdawat Kaniya tungod sa unsa unyay buhaton sa uban nganha kanila. Daghang mga katawhan karon nangahadlok nga mahimong mga Cristohanon tungod sa mao gihapong hinungdan. Ang uban mga magtotoo sa tago lamang.

Juan 12:43. Kay labi pa man ugod nilang gihigugma ang mga pagdalayeg gikan sa mga tawo kay sa pagdalayeg gikan sa Dios.

Buhata Kini

9. Sag-uloha ang Juan 12:43.
10. Pag-ampo alang kanila nga mga magtotoo sa tago lamang.

**ANG PULONG NI JESUS MAO ANG
MAGAHUKOM****(Basaha ang Juan 12:44-50)**

Ang mga pulong nga gidumilian nila sa pag-pamati maò ra usab ang mga pulong diin ipasukad ang paghukom batok kanila sa adlaw unya sa katapusang paghukom. Ang tanan nga nagatoo sa mga pulong ni Jesus ug nagabuhat sa Iyang gipanulti kanila dili mahiagum sa silot. Kadtong wala magatoo sa gipanulti ni Jesus dili makabaton sa kinabuhing dayon;

Buhata Kini

11. Unsa man ang basihanan sa paghukom sa katawhan sa katapusang panahon?
 - . . . a) Pagahukman sila pinaagi sa mga pulong ni Jesus
 - . . . b) Pagahukman sila pinaagi sa mga balaod sa nasud nga ilang gipuy-an.
 - . . . c) Pagahukman sila pinaagi sa Napulo ka mga Sugo.
12. Itandi ang imong mga tubag sa hustong mga tubag nga anaa sa katapusan niining leksyona.
13. Sulati ang imong rekord sa estudyante alang sa ika-12 nga leksyon.

Mga Tubag sa Ika-12 nga Leksyon

Kon aduna kay 6 o 7 ka hustong mga tubag markahi ug labing maayo; kon 5, markahi ug maayo; kon 4 ra, kasarangan; Kon kubos sa 4 ang imong mga hustong tubag basaha pag-usab kining leksyona.

1. b) Gibuboan ni Maria ang tiil ni Jesus sa pahumot ug si Judas miingon nga maayo pa ug gibaligya kini.
2. a) Tungod kay daghan ang mitoo kang Jesus pinaagi sa pagpamatuod ni Lazaro
3. a) Usa ka pagsa-ulog sa mga katawhan sa pagluwas sa Dios kanila gikan sa pag-kaulipon.
4. c) Giabi-abi Siya sa mga tawo ug gitawag ug Hari sa Israel.
5. b) Siya mahimong hari sa atong kinabuhi
8. c) Iyang giangkon ang sala sa mga katawhan apan kadto lamang mga motoo Kaniya mao ang makabaton sa kagawasan sa silot sa sala.
11. a) Pagahukman sila pinaagi sa mga pulong ni Jesus.

Gidaghanon sa hustong mga tubag _____
 Grado _____